

Dževad Drino*

PRIKAZ KNJIGE

Prof.dr. Šaban Nurić: Međunarodno javno pravo I i II, drugo prerađeni i dopunjeno izdanje, Pravni fakultet u Kiseljaku, Kiseljak 2010.

Predavač na katedri međunarodnog prava na Pravnom fakultetu u Kiseljaku, prof.dr. Šaban Nurić, izdao je dragocjen udžbenik za svoje studente, ali koji je namijenjen očito i širem krugu zainteresiranih čitatelja. Knjiga na ukupno 381 strani sadrži uvodne napomene autora, prvi dio-Međunarodno pravo I, drugi dio-Međunarodno pravo II, zaključne preporuke, izvode iz recenzija, te popis korištene literature i izvora.

Autor je svjesno učinio napor da problematiku međunarodnog javnog prava, sa tradicionalno teških i glomaznih udžbenika, svede na prihvatljivu i čitljivu knjigu, prilagođenu „bolonjskom vremenu“ naših univerziteta ali i realnom opterećenju današnjih studenata pravnih fakulteta. Pri tom je, dakako, svjesno rizikovao da u svođenju monumenta na minijaturu, što predstavlja zahtjevan zadatak za svakog autora, ostane u pojedinim poglavljima dijelom nedorečen, pretpostavljajući realnost zahtjeva cjelovitosti i jasnoće prezentiranja na uskom prostoru epskoj širini dosadašnjih autora. Jednostavnije rečeno, današnji autori ne mogu slijediti stare univerzitetske udžbenike, koji su upravo u ovoj oblasti nerijetko prelazili i hiljade stranica a koji su još u funkciji na pojedinim fakultetima koji se diče „provedbom Bolonje“.

U svom radu autor Nurić pregledno analizira stanak i razvoj, uspostavu i oblike primjene, ali i preobražaj i suvremene izazove međunarodnog

* Pravni fakultet Univerziteta u Zenici

javnog prava, opredjelivši se za zanimljivu metodologiju izlaganja materije upravu po predviđenom programu nastave, ali bez grupisanja u pojedine cjeline i sadržaje. Ovakav oblik možda jeste olakšanje studentima, ali umnogome utiče na ukupnu preglednost i jasnoću izlaganja, pogotovo na povezivanje tematskih cjelina i realno jeste zahtjevno rješenje za bilo koji udžbenik pa tako i za ovaj. U primjenjivanju ovakvog metoda očita je namjera autora da pokuša olakšati studentima proces savladavanja zahtjevne materije međunarodnog javnog prava i čini svakako zanimljiv eksperiment u udžbeničkoj metodologiji, što ukazuje da bi vrijedilo pratiti njegovu primjenu u praksi i konačnom cilju, savladavanja i usvajanja ove materije kod studenata. Lična i stručna odvažnost autora zaslužuje pažnju i respekt jer je svjesno ušao u bezvazdušni udžbenički prostor hrabro nudeći vlastiti uradak na sud naučne i stručne javnosti, ne zaklanjajući se iza ispraznog navođenja beskonačnog broja slučajeva primjene instituta međunarodnog javnog prava, tako čest u savremenim djelima.

Autorov pristup interpretaciji međunarodnog javnog prava sasvim odgovara metodama suvremene anglosaksonske škole (autor je doktorirao u Sjedinjenim Američkim Državama), tako da se čitatelji upoznaju s različitim idejama i gledištima koja zastupaju pojedini autori unutar različitih instituta međunarodnog javnog prava u kontekstu tumačenja postmodernog društvenog razvitka. Ovaj udžbenik univerzitetskog karaktera predstavlja realan doprinos razvitku nauke međunarodnog javnog prava, pogotovo ako se ima u vidu višedecenijska stagnacija izučavanja ove naučne discipline u Bosni i Hercegovini.

Knjiga je pisana razumljivim jezikom, tako da je prisupačna i osobama kojima ova oblast nije bliska u naučnom smislu, a naročito se preporučuje nastavnom kadru i studentima ne samo pravnih, nego i društvenih nauka općenito.